

**FORU GOBERNU KONTSEILUAREN 4/2022 ZERGA PREMIAZKO ARAUGINTZAKO  
DEKRETUA, MARTXOAREN 15EKOA. FINANTZA TRANSAKZIOEN GAINEKO ZERGA  
ONESTEA**

**(ALHAO, 35. zk., 2022-3-23)**

(Arabako Batzar Nagusiek 2022ko martxoaren 30eko 7/2022  
Foru Arauaren bidez baliozkotu zuten)

Ekonomia Itunaren aldaketa berriak finantza transakzioen gaineko zerga ituntzea ekarri du. Indarreko Ekonomia Itunaren 34 bis artikulua jasotzen du zerga hori, eta bertan xedatzen denez, tributu bat da eta Estatuak une bakoitzean ezarrita dituen arau substantibo eta formal berak erabiliko dira hura arautzeko.

Transakzio Finantzarioen gaineko Zergaren urriaren 15eko 5/2020 Legeak sortu zuen zerga hori, eta zeharkako zerga bat da, akzioen eskuraketak zergapetzen dituen, eragiketan parte hartzen duten pertsonen edo erakundeen bizilekua edo kokalekua edozein dela ere.

Zerga berri hori Arabako Lurralde Historikoko zerga ordenamenduan txertatu behar denez gero, zerga premiazko araugintzako dekretu hau eman behar da.

Aztertu da Zerga Araudiaren Zerbitzuak horri buruz egindako txostena.

Horregatik, lehenengo diputatu nagusiorde eta Ogasun, Finantza eta Aurrekontu Saileko diputatuak proposatuta eta Foru Gobernu kontseiluak gaur egin duen bileran gaia aztertu ondoren, Arabako Zergen otsailaren 28ko 6/2005 Foru Arau Orokorrek 8. artikuluan eta Arabako Foru Aldundiaren antolaketa, funtzionamendu eta araubide juridikoaren abenduaren 18ko 52/1992 Foru Arauak ematen dizkidaten eskumenez baliatuz, presako arrazoiak direla eta, hona hau

**XEDATZEN DUT**

**1. artikulua. Izaera eta aplikazio eremua**

1. Finantza transakzioen gaineko zerga zeharkako zerga da eta akzioen eskuraketak zergapetzen ditu Zerga Premiazko Araugintzako Dekretu honetan ezartzen den bezala.

2. Zerga aplikatuko da eskuraketa egiten den lekua edozein dela ere, eta eragiketan parte hartzen duten pertsonen edo erakundeen bizilekua edo kokalekua edozein dela ere.

## **2. artikulua. Aplikatu beharreko arauak**

1. Indarreko Ekonomia Itunaren 34 bis artikuluan xedatutakoaren esparruan, zerga premiazko araugintzako dekretu honetan eta berau garatzen duten xedapenetan ezarritakoarekin bat etorritik eskatuko da zerga hau.
2. Zerga premiazko araugintzako dekretu honetan ezarritakoak ez du ezertan eragozten nazioarteko itun eta hitzarmenetan xedatutakoa.

## **3. artikulua. [\(1\)](#) Zergaren ordainarazpena eta ikuskapena**

1. Subjektu pasiboek, zerga egoitza nonahi dutela ere, Arabako Foru Aldundiari ordainduko diote zerga, Arabako Lurralde Historikoan likidazioaldi bakoitzean egiten dituzten eragiketen bolumenaren proportzioan.
2. [\(1\)](#) Likidazioaldi bakoitzean Araban egindako eragiketen bolumenaren proportzioa honako ehuneko honen arabera izango da: egoitza soziala Araban duten sozietateen akzioei dagozkien eragiketen zerga oinarriaren ehuneko subjektu pasiboaren guztizko zerga oinarrian. Ehuneko hori bi dezimaletan biribilduko da.
3. [\(1\)](#) Arabako Foru Aldundiaren organoei dagokie zerga ikuskatzea, baldin eta subjektu pasiboaren zerga egoitza Arabako Lurralde Historikoan badago, eragindako gainerako zerga administrazioen elkarlana baztertu gabe, eta ondorioak izango ditu administrazio eskudun guztien aurrean, haiei dagokien zerga proportzioa barne.

Ikuskapen jarduketaren horien ondorioz hainbat administrazioi zorren bat ordaindu edo kopururen bat itzularazi behar zaiela jakiten bada, Arabako zerga administrazioak kobratu edo ordainduko du zor edo itzultze hori, eta administrazioek gero emango dizkiote konpentsazioak elkarri, beharrezkoa bada.

Arabako Foru Aldundiaren organo ikuskatzaileek beren jarduketaren emaitzen berri emango diete eragindako gainerako administrazioei.

Haren egiaztapenetan ezarritako proportzioak ondorioak ekarriko ditu zergadunarentzat, likidatutako betebeharrei dagokienez, baina horrek ez du galarazten egiaztapen horien ondoren administrazio eskudunen artean behin betiko beste proportzio batzuk erabakitzea.

## **4. artikulua. Zerga egitatea**

1. Zergapetuta egongo dira Espainiako nazionalitatea duten sozietateen kapital soziala ordezkatzeko akzioen kostu bidezko eskuraketak –uztailaren 2ko 1/2010 Legegintzako Errege Dekretuaren bidez onetsitako Kapital Sozietateen Legearen testu bateginaren 92. artikuluan zehaztutakoaren arabera–, baldintza hauek betetzen direnean:

a) Sozietateak bere akzioak negoziatzeko onartuta izatea Espainiako merkatu batean edo Europar Batasuneko beste estatu bateko merkatu batean, eta merkatu hori araututa egotea finantza tresnen merkatuei buruzko Europako Parlamentuaren eta Kontseiluaren 2014ko maiatzaren 15eko 2014/65/ EB Zuzentarauan aurreikusitakoaren arabera, edo hirugarren herrialde bateko merkatu baliokide batean, zuzentzarau horren 25.4 artikuluan xedatutakoaren arabera.

b) Sozietatearen burtsako kapitalizazio balioa 1.000 milioi eurotik gorakoa izatea eskuraketaren aurreko urteko abenduaren 1ean.

Apartatu honetan aipatzen diren eskuraketak zergapetuta egongo dira, alde batera utzita nola exekutatzen diren: negoziazio zentro batean, aipatutako zuzentarauaren 4. artikuluan 1. apartatuaren 24. zenbakian definitzen den bezala; beste edozein merkatu edo kontratazio sistematan; barneratzaile sistematik baten bidez, urriaren 23ko 4/2015 Legegintzako Errege Dekretuak onetsitako Balore Merkatuaren Legearen testu bateginaren 331. artikuluan definitzen den bezala; edo kontratugileen arteko zuzeneko akordio bidez.

**2. Era berean, zergapetuta egongo dira:**

a) Artikulu honen 1. apartatuan aipatutako akzioak ordezkatzeko dituzten gordailu ziurtagiriek eratutako balore negoziagarrien kostu bidezko eskuraketak, balore horien erakunde jaulkitzailearen kokalekua edozein izanda ere.

Hala ere, ez dira zergapetuta egongo aurreko paragrafoan aipatzen diren baloreak jaulkitzeko helburu bakarrarekin egindako akzio eskuraketak. Era berean, honako hauek ez dira zergapetuta egongo: a) letra honetan aipatzen diren gordailu ziurtagiriak eskuratzea, baldin eta, trukean, horiek ordezkatzeko dituzten akzioak entregatzen baditu eskuratzailerak; edo gordailu ziurtagiri horiek ezerezteko egiten diren eragiketak, ordezkatzeko dituzten akzioak emanez titularrei.

b) Artikulu honen 1. apartatuan eta apartatu honen a) letran aipatzen diren baloreen eskuraketak, baldin eta honako hauen exekuziotik edo likidaziotik eratortzen badira: obligazio edo bonu bihurtzeko edo trukagarriak, finantza tresna eratorriak, edozein finantza tresna edo azaroaren 10eko EHA/3537/2005 Aginduaren 2. artikuluko 1. apartatuaren laugarren paragrafoan definitutako finantza kontratuak (Balore Merkatuaren uztailaren 28ko 24/1988 Legearen 27.4 artikulua garatzen du agindu horrek).

## **5. artikulua. Salbuespenak**

**1. Honako akzio eskuraketa hauek zerga ordaintzetik salbuetsita egongo dira:**

a) Akzioak jaulkitzetik eratorritako eskuraketak.

Halaber, salbuetsita egongo dira zerga premiazko araugintzako dekretu honen 4. artikuluan 2. apartatuaren a) letran aipatzen diren gordailu ziurtagiriak —balore horiek sortzeko bakarrik jaulkitako akzioak ordezkatzeko dituztenak— jaulkitzetik eratorritako eskuraketak.

b) Akzioak saltzeko eskaintza publiko batetik eratorritako eskuraketak, urriaren 23ko 4/2015 Legegintzako Errege Dekretuaren bidez onetsitako Balore Merkatuaren Legearen testu bateginaren 35.1 artikuluan definitutakoaren arabera, inbertitzaileen artean hasieran kokatzean.

c) Aurreko a) eta b) letran aipatutakoen aurretik egindako eskuraketak, azken inbertitzaileen artean akzio horien azken banaketa egiteko jaulkitzaileek edo eskaintzaileek kontratatu dituzten kokatzaile eta aseguratzaileek izaera instrumentalarekin egindakoak, bai eta eragiketa horien kokatzaile gisa eta, bereziki, aseguratzaile gisa, hala badagokio, dituzten betebeharrak betez egindako eskuraketak ere.

d) Burtsan akzioak onartzeko testuinguruan, prezioak egonkortzeko ardura duten finantza bitartekariak egindako eskuraketak, egonkortze enkargu baten esparruan, hemen jasotako aurreikuspenen arabera: Merkatu Abusuari buruzko Europako Parlamentuaren eta Kontseiluaren 2014ko apirilaren 16ko 596/2014 (EB) Erregelamendua, zeinak indargabetzen baititu Europako Parlamentuaren eta Kontseiluaren 2003/6/EE Zuzentaraua eta Batzordearen 2003/124/EE, 2003/125/EE eta 2004/72/EE zuzentarauak.

e) Erosketa edo mailegu eragiketetatik eta kontrapartida erakunde zentral batek edo baloreen gordailuzain zentral batek zerga honek zergapetutako finantza tresnen gainean egindako gainerako eragiketetatik eratorritako eskuraketak, konpentsazioaren edo baloreen likidazioaren eta erregistroaren esparruan dagozkien eginkizunak gauzatzean.

Letra honetan sartzen dira kontrapartida erakunde zentralaren berezko nobazio eragiketak, bai eta likidazioaren akats baten ondoriozko berrerosketa eragiketa baten esparruan egindako eragiketak ere, erregelamendu honetan jasotakoaren arabera: Europar Batasunean baloreen likidazioa hobetzeari eta baloreen gordailuzain zentrali buruzko Europako Parlamentuaren eta Kontseiluaren 2014ko uztailaren 23ko 909/2014 (EB) Erregelamendua, zeinaren bidez aldatu baitziren 98/26/EE eta 2014/65/EB zuzentarauak eta 236/2012 (EB) Erregelamendua.

f) Finantza bitartekariak likidezia hornitzaileen eginkizunak betetzean akzioen jaulkitzailearen kontura egindako eskuraketak, Balore Merkatuaren Batzorde Nazionalaren apirilaren 26ko 1/2017 Zirkularrean eskatutako betekizunak betetzen dituen likidezia kontratu baten indarrez, baldin eta helburu bakarra bada eragiketen likidezia eta akzioen kotizazioaren erregularitasuna bultzatzea, Balore Merkatuaren Batzorde Nazionalak onartutako merkatu praktiken esparruan, Merkatu Abusuari buruzko Europako Parlamentuaren eta Kontseiluaren 2014ko apirilaren 16ko 596/2014 (EB) Erregelamenduan aurreikusitakoaren arabera.

g) Merkatua sortzeko jardueren esparruan egindako eskuraketak.

Ondorio horietarako, halakotzat hartzen dira inbertsio zerbitzuetako enpresa baten, kreditu erakunde baten edo hirugarren herrialde bateko erakunde baliokide baten jarduerak, Europako Batzordeak baliokidetzat jotako esparru juridikoa eta gainbegiratze esparrua duen hirugarren herrialde bateko negoziazio zentro edo merkatu bateko kide badira, baldin eta erakunde horietako edozeinek bere konturako bitartekari gisa jarduten badu finantza tresna bati dagokionez, tresna hori negoziatua izanik negoziazio zentro baten barruan edo hortik kanpo, modu hauetako edozeinetan:

1. Aldi berean magnitude konparagarria duten eta lehia baldintzetan dauden erosketa eta salmenta kotizazio irmoak iragarritz, eta, horrela, modu erregularrean eta etengabe likidezia emanaz merkatuari.

2. Ohiko jardueraren esparruan, bezeroek hasitako aginduak exekutatzuz edo bezeroek egindako salerosketa eskaerei erantzunez.

3. Aurreko 1. eta 2. zenbakietan aipatutako jarduerak exekutatzearen ondoriozko posizioak estaliz.

Salbuespen hori aplikatuko da, halaber, letra honetan aurreikusitako modu berean, eskuraketen xedea zerga premiazko araugintzako dekretu honen 4. artikulua 2. apartatuaren a) letraren lehen paragrafoan aipatutako baloreak direnean.

h) Talde bereko erakundeen artean akzioak eskuratzea, Merkataritza Kodearen 42. artikulua arabera.

i) Bategiteen, zatiketen, aktibo ekarpenen, balore trukeen, aktiboaren eta pasiboaren lagapen osoen eta Europako sozietate baten edo Europako sozietate kooperatibo baten egoitza Europar Batasuneko kide den estatu batetik beste batera aldatzearen araubide berezia aplikatzen diren eskuraketak. Araubide hori Sozietateen gaineko Zergaren abenduaren 13ko 37/2013 Foru Arauaren VI. tituluko VII. kapituluaren dago araututa.

Era berean, inbertsio kolektiboko erakundeen edo inbertsio kolektiboko erakundeen konpartimentu edo azpifuntsen bategite edo zatiketa eragiketen ondorioz eginiko eskuraketak, dagokion araudi erregulatuak aurreikusitakoaren babesean eginak.

j) Baloreak finantzatzeko eragiketak, Europako Parlamentuaren eta Kontseiluaren 2015eko azaroaren 25eko 2015/2365 (EB) Erregelamenduaren 3. artikulua 11. apartatua aipatzen direnak (erregelamendu hori baloreen finantzaketarako eta berrerabilerarako eragiketen gardentasunari buruzkoa da, eta 648/2012 (EB) Erregelamendua aldatzen du), bai eta titulartasun aldaketa dakarren finantza bermeko akordio baten ondoriozko kolateral eragiketak ere —titulartasun aldaketarekin—, aipatutako erregelamenduaren 3. artikulua 13. apartatua definitzen den bezala.

k) Suntsiarazpen Batzar Bakarrak edo suntsiarazpen agintaritza nazional eskudunek hartutako suntsiarazpen neurriak aplikatzearen ondoriozko eskuraketak, honako hauetan jasotako baldintzetan: Europako Parlamentuaren eta Kontseiluaren 2015eko uztailaren 15eko 806/2014 (EB) Erregelamendua (erregelamendu horren bitartez, arau uniformeak eta prozedura uniformea ezartzen dira kreditu erakundeak eta inbertsio zerbitzuetako enpresa jakin batzuk suntsiarazteko, betiere Suntsiarazpen Mekanismo Bakarraren eta Suntsiarazpen Funtz Bakarraren esparruan, eta 1093/2010 (EB) Erregelamendua aldatzen da) eta kreditu erakundeak eta inbertsio zerbitzuetarako enpresak berreskuratu eta suntsiaraztearen ekainaren 18ko 11/2015 Legea.

l) Akzio propioen edo sozietate nagusiaren akzioen eskuraketak, bere taldeko kide den beste edozein erakundek egindakoak Merkataritza Kodearen 42. artikulua arabera, baldin eta berrerosteta programa baten esparruan egindakoak badira eta helburu bakartzat honako hauetakoren bat badute:

1. Jaulkitzailearen kapitala murriztea.

2. Akzio bihur daitezkeen zor tresna finantzarioei datzekien betebeharrak betetzea.

3. Jaulkitzailearen edo taldeko erakunde baten administrazio edo gainbegiratze organoetako kideentzako edo enplegatuentzako akzio aukeren edo beste akzio esleipen batzuen programetatik eratorritako betebeharrak betetzea.

m) [\(2\)](#) Enpleguko pentsiofuntsek eta gizarte aurreikuspeneko mutualitateek edo irabazteko xederik gabeko borondatezko gizarte aurreikuspeneko erakundeek egindako eskuraketak.

2. Hirugarrenen kontura jarduten duen subjektu pasiboak artikulua honen 1. apartatua ezarritako salbuespenak aplikatzen dituzan, eskuratuak jakinarazi behar dituzten salbuespenak aplikatzeko egitatezko kasuak gertatzen direla, eta informazio hau eman behar dituzte:

- a) 1. apartatuaren a), b) eta c) letratan jasotako salbuespenei dagokienez, dagozkion jaukipenak edo akzioak saltzeko eskaintza publikoa identifikatu beharko ditu.
- b) 1. apartatuaren e) letran jasotako salbuespenari dagokienez, baloreen konpentsazio, likidazio eta erregistro eragiketak egiten dituen erakundearen identifikazioa.
- c) 1. apartatuaren f) letran jasotako salbuespenari dagokienez, likidezia hornitzailearen eragiketak egiten dituen erakundearen identifikazioa. Halaber, likidezia kontratuaren iragarkia merkatuan aurkeztu beharko da.
- d) 1. apartatuaren h) letran jasotako salbuespenari dagokienez, sozietate taldearen identifikazioa.
- e) 1. apartatuaren i) letran jasotako salbuespenari dagokienez, enpresak berregituratzeko prozesuak eragindako erakundearen identifikazioa, edo bategitean edo zatiketan sartuta dauden inbertsio kolektiboko erakundeena, eta dagozkion agintaritza eskudunak eragiketari emandako baimena.
- f) 1. apartatuaren j) letran jasotako salbuespenari dagokienez, finantzaketa eragiketan edo titulartasuna aldatzea dakarten kolateral eragiketetan parte hartzen duten erakundearen identifikazioa.
- g) 1. apartatuaren k) letran jasotako salbuespenari dagokienez, suntsiarazpen neurriak hartzeko erabakiaren identifikazioa.
- h) 1. apartatuaren l) letran jasotako salbuespenari dagokienez, eragiketak integratuta dauden berrerosteta programaren identifikazioa.
- i) [\(2\)](#) 1. apartatuaren m) letran jasotako salbuespenari dagokienez, enpleguko pentsiofunttsaren, gizarte aurreikuspeneko mutualitatearen edo borondatezko gizarte aurreikuspeneko erakundearen identifikazioa.

Apartatu honetan aipatzen diren erakundeak identifikatzeko, beharrezkoa izango da, hala badagokio, Erakunde Juridikoaren Identifikatzailea jakinaraztea (LEI, ingelesez dituen siglengatik).

Subjektu pasiboak eta eskuratzailleak zerga administrazioaren eskura izan beharko dituzte jakinarazpena egin dela eta jakinarazpenaren edukia egiaztatzen duten egiaztagiria.

## **6. artikulua. Sortzapena**

Baloreen kontu edo erregistro batean —dela zaintza zerbitzua ematen duen erakunde batean, dela baloreen gordailuzain zentral baten sisteman— eskuratzaillearen aldeko baloreen erregistro idatzoharra egiten den unean sortuko da zerga, baloreak eskuratzea eragin duen finantza tresnaren edo eragiketaren likidazioaren ondorioz.

## **7. artikulua. Zerga oinarria**

**1.** Zerga oinarria zergapeko eragiketen kontraprestazioaren zenbatekoa izango da, honako hauek sartu gabe: merkatu azpiegituren prezioetatik eratorritako transakzio kostuak, bitartekotza komisioak eta eragiketari lotutako bestelako gastuak.

Kontraprestazioaren zenbatekoa adierazten ez den kasuan, zerga oinarria izango da merkatu arautu garrantzitsuenaren itxierari dagokion balioa, eragiketaren aurreko azken negoziazio egunean dagokion baloreak duen likidezia kontuan hartuta. Ondorio horietarako, likidezari dagokionez merkatu garrantzitsuena Batzordearen 2016ko uztailaren 14ko 2017/587 (EB) Erregelamendu Delegatuaren 4. artikulua arabera zehaztuko da; erregelamendu horren bidez, Europako Parlamentuaren eta Kontseiluaren finantza tresnen merkatuei buruzko 600/2014 (EB) Erregelamendua osatzen da, negoziazio zentroi eta inbertsio zerbitzuetako enpresei aplikatzekoak diren gardentasun betekizunei buruzko arau teknikoek dagokienez – akzioak, gordailuzainaren ordainagiriak, kotizatutako funtsak, ziurtagiriak eta antzeko beste finantza tresna batzuk– eta akzio jakin batzuei buruzko eragiketak negoziazio zentro batean edo barneratzaile sistematiko baten bidez egiteko betebeharre dagokienez.

**2.** Artikulu honen 1. apartatua xedatutakoa gorabehera, zerga oinarria zehazteko honako arau berezi hauek aplikatuko dira:

a) Zergapeko baloreen eskuraketa bonu edo obligazio bihurtarri edo trukagarrietatik edo eskurapen hori eragiten duten bestelako balore negoziagarrietatik datorrenean, horien jaulkipen agirian zehaztutako balioa izango da zerga oinarria.

b) Eskuraketa zergapeko baloreak eskuratzeko edo eskualdatzeko eskubidea ematen duten aukerak edo beste finantza tresna eratorri batzuk exekutatzetik edo likidatzetik datorrenean, zerga oinarria kontratuan finkatutako ekitaldi prezioa izango da.

c) Eskuraketa eperako transakzio bat osatzen duen tresna eratorri batetik datorrenean, zerga oinarria itundutako prezioa izango da, baldin eta tresna eratorri hori merkatu arautu batean negoziatzen ez bada; kasu horretan, mugaegunean zer entrega-preziotan egin behar den eskuraketa, hori izango da zerga oinarria.

d) Eskuraketa zerga premiazko araugintzako dekretu honen 4. artikulua 2. apartatuaren b) letran aipatzen den finantza kontratu baten likidaziotik datorrenean, artikulu honen 1. apartatuaren bigarren paragrafoan aurreikusitakoaren arabera zehaztuko da zerga oinarria.

Hirugarrenen kontura jarduten duen subjektu pasiboak apartatu honetan aurreikusitako arau bereziak aplikatu ahal izan ditza, eskuratzailerak jakinarazi beharko dio aplikazio hori eragiten duten egitatezko kasuak gertatzen direla, bai eta kasu bakoitzean zerga oinarriaren kuantifikazioa zehazten duten elementuak ere.

**3.** Baldin eta egun berean zergapeko balore beraren eskuraketak eta eskualdatzeak egiten badira, subjektu pasibo berak aginduta edo exekutatuta, eskuratzailerak berari dagokionez, eta, gainera, egun berean likidatzen badira, eskuraketa horiei dagokien zerga oinarria honela kalkulatu da: egun berean eskuratutako balore kopurutik eskualdatutakoak kendu, eta, diferentzia positibo hori, zatidura honekin biderkatu: aipatutako eskuraketen kontraprestazioen batura zati eskuratutako balore kopurua. Kalkulu hori egiteko, kanpoan utziko dira zerga

premiatzko araugintzako dekretu honen 5. artikuluan aurreikusitako eskuraketa salbuetsiak, bai eta salbuespen horien aplikazio esparruan egindako eskualdatzeak ere.

## **8. artikulua. Zergadunak, subjektu pasiboak eta erantzuleak**

1. Zergaduna da zerga premiatzko araugintzako dekretu honen 4. artikulua aipatzen dituen baloreen eskuratzailerak.

2. Zergaren subjektu pasiboa da, kokalekua edozein dela ere:

a) Eskuraketa norberaren kontura egiten duen inbertsio zerbitzuetako enpresa edo kreditu erakundea.

b) Eskuraketa ez bada egiten norberaren kontura diharduten inbertsio zerbitzuetako enpresa batek edo kreditu erakunde batek, haiek izango dira subjektu pasiboak, zergadunaren ordezkoko gisa:

1. Eskuraketa negoziazio zentro batean egiten bada, hura exekutatzeko duen merkatuko kidea izango da subjektu pasiboa. Hala ere, agindua merkatuko kideari helaraztean finantza bitartekari batek edo gehiagok esku hartzen dutenean eskuratzaileraren kontura, agindua zuzenean eskuratzailerarengandik jasotzen duen finantza bitartekaria izango da subjektu pasiboa.

2. Eskuraketa negoziazio zentro batetik kanpo exekutatzeko bada, barneratzaile sistematikoko baten jardura eremuan, subjektu pasiboa barneratzaile sistematikoa bera izango da. Hala ere, eskuraketan finantza bitartekari batek edo gehiagok esku hartzen dutenean eskuratzaileraren kontura, agindua zuzenean eskuratzailerarengandik jasotzen duen finantza bitartekaria izango da subjektu pasiboa.

3. Eskuraketa negoziazio zentro batetik eta barneratzaile sistematikoko baten jardueratik kanpo egiten bada, subjektu pasiboa izango da baloreen eskuratzaileraren agindua jasotzen duen finantza bitartekaria, edo eskuratzailerari entregatzen diona finantza tresna edo kontratu baten exekuzioaren edo likidazioaren ondorioz.

4. Eskuraketa negoziazio zentro batetik kanpo eta aurreko paragrafoetan aipatutako pertsona edo erakundeen esku hartzerik gabe exekutatzeko bada, subjektu pasiboa izango da eskuratzaileraren kontura baloreak gordailutzeko zerbitzua ematen duen erakundea.

Ondorio horietarako, eskuratzailerak gordailu zerbitzua ematen duen erakundeari jakinarazi beharko dizkio zerga ordaintzeko betebeharra zehazten duten inguruabarrak, bai eta haren kuantifikazioa ere.

3. Zerga zorraren erantzule solidarioa izango da baloreen eskuratzailerak, baldin eta subjektu pasiboari informazio okerra edo ez zehatza jakinarazi badi, eta informazio hori erabakigarria izan bada zerga premiatzko araugintzako dekretu honen 5. artikuluan aurreikusitako salbuespenak behar ez bezala aplikatzeko, edo zerga premiatzko araugintzako dekretu honen 7. artikuluan 2. apartatuan aurreikusitako zerga oinarria zehazteko arau bereziak behar ez bezala aplikatzearen ondorioz zerga oinarri txikiagoa ezartzeko.



Zerga oinarria zehazteko arau bereziak edo salbuespenak behar ez bezala edo oker aplikatzeari dagokion zerga zorra hartuko du erantzukizunak.

Era berean, artikulua honen 2. apartatuaren b) letraren 4. zenbakian aipatzen den kasuan, erantzule solidarioa izango da 4. zenbaki horretan aipatzen den jakinarazpena egin ez duen baloreen eskuratzailerak, baita jakinarazpen hori oker edo modu ez zehatzean egin duena ere.

Jakinarazpenik ez egiteak edo jakinarazpen hori oker edo modu ez zehatzean egiteak eragindako zerga zorra hartuko du erantzukizunak.

### **9. artikulua. Zerga tasa**

Ehuneko 0,2koa izango da eskatzen den zerga tasa.

### **10. artikulua. Aitorpena eta diru sarrera egiteko betebeharra eta dokumentazio betebeharrak**

1. Subjektu pasiboek autolikidazioa aurkeztu eta ateratzen den zerga zorraren zenbatekoa sartu beharko dute, Ogasun, Finantza eta Aurrekontu Saileko foru diputatuaren foru agindu bidez ezartzen den leku, modu eta epeetan eta foru aginduan bertan zehaztutako edukiarekin.

2. Subjektu pasiboek zergaren autolikidazioak aurkeztuko dizkiote Arabako Foru Aldundiari, zerga ordainarazteko eskumena duenean. Autolikidazio horietan, administrazioetako bakoitzari dagozkion kuotak jaso beharko dira beti.

Beharrezkoak diren itzulketak Arabako Foru Aldundiak egingo ditu, bakoitzari dagokion proportzian.

3. Erregelamenduz ezartzen diren modu eta baldintzetan, subjektu pasiboek autolikidazioa aurkeztuko dute, eta ateratzen den zerga zorraren zenbatekoa sartuko, Espainiako lurraldean kokatuta dagoen balore gordailuzain zentral baten bitartez.

Ondorio horietarako, subjektu pasiboek balore gordailuzain zentralari jakinarazi beharko diote autolikidazioan jaso beharreko informazio guztia, eta ateratzen den zerga zorraren zenbatekoa ordaindu beharko diote, zuzenean edo erakunde parte hartzaileen bitartez, izaera hori ez duten subjektu pasiboen kasuan.

Balore gordailuzain zentralak subjektu pasibo bakoitzeko autolikidazio bat aurkeztuko du, subjektu pasiboaren izenean eta kontura, eta likidazio aldiari dagokion zerga zorraren zenbatekoa sartuko du erregelamendu bidez ezartzen den leku, modu eta epean, eta erregelamenduan bertan zehaztutako edukiarekin.

Apartatu honetan aipatutako zerga honen autolikidazioak aurkezteko eta sartzeko prozedura zabaldu ahal izango da Europar Batasuneko beste estatu batzuetan edo Europar Batasunean zerbitzuak emateko aitortuta dauden hirugarren estatuetan kokatutako beste balore gordailuzain zentral batzuetara, Espainiako lurraldean kokatuta dagoen balore gordailuzain zentral batekin sinatutako lankidetzak akordio bidez.

4. Likidazio aldia hilabete naturalarekin bat etorriko da.

Zerga honi dagokion zerga zorra ezin izango da geroratu edo zatikatu.

**5.** Artikulu honen 3. apartatuan xedatutakoa aplikatuz, balore gordailuzain zentralak autolikidazioak aurkezteak eta zerga zorra sartzeak ez du sortuko zerga erantzukizun espezifikorik, ez gordailuzain zentralarentzat, ez haren erakunde parte hartzaileentzat.

Espainiako lurraldean kokatutako balore gordailuzain zentralak, haren erakunde parte hartzaileek eta zergaren subjektu pasiboek, zergaren kontrola eta kudeaketa errazte aldera, zerga administrazioaren eskura izan beharko dituzte zergapeko eragiketei buruzko dokumentazioa edo fitxategiak.

**6.** Balore gordailuzain zentralak eta haren erakunde parte hartzaileek autolikidazioa aurkezteko eta diru sarrera egiteko betebeharra betetzeko soilik erabili ahal izango dute subjektu pasiboak jakinarazitako informazioa, artikulu honen 3. apartatuan xedatutakoaren arabera. Informazio hori zerga administrazioari jakinarazi beharko zaio zerga araudian aurreikusitako kasuetan.

Aurreko paragrafoan xedatutakoa salbu, informazio hori isilpekoa da. Balore gordailuzain zentralak eta haren erakunde parte hartzaileek isilpean gorde beharko dute informazio hori.

## **11. artikulua. Arau hausteak eta zehapenak.**

Zerga premiazko araugintzako dekretu honetan eta berau garatzen duen araudian xedatutakoa ez betetzetik eratorritako zerga arloko arau hausteak Arabako Zergen otsailaren 28ko 6/2005 Foru Arau Orokorak xedatutakoari jarraikiz kalifikatu eta zehatuko dira.

### **AZKEN XEDAPENAK**

#### **Lehenengoa. [\(1\)](#) Indarrean jartzea.**

Xedapen orokor hau ALHAOn argitaratu eta hurrengo egunean jarriko da indarrean, eta 2021eko urtarrilaren 16tik aurrera sortuko ditu ondorioak, hargatik eragotzi gabe ekonomia itunaren hamargarren xedapen iragankorrean ezarritakoa.

#### **Bigarrena. Gaitzea.**

Baimena ematen zaio Arabako Foru Aldundiari xedapen orokor hau garatzeko eta aplikatzeko behar diren xedapen guztiak emateko.

#### **Hirugarrena. Batzar Nagusietara bidaltzea.**

Zerga premiazko araugintzako dekretu hau Arabako Batzar Nagusietara bidaliko da, indarrean dagoen arautegian ezarritakoarekin bat etorritz baliozkotu edo baliogabetu dezaten.

### **OHARRAK**

(1) 6/2022 Zerga Premiazko Araugintzako Dekretua, apirilaren 12koa.

(ALHAO, 45. zk., 22-04-20koa)

(2) 10/2022 Zerga Premiazko Araugintzako Dekretua, abuztuaren 2koa.  
(ALHAO, 90. zk., 22-08-8koa)